

Гуртысь механизатор - удмурт писатель-сатирик

Игра ёрос администрацилэн архив ёзэтак дано адямиослэн документъёссы но утисько. Соос пöлын одйгез - Константин Васильевич Емельяновлэн (23.09.1926-22.09.2016) - сиё-дано колхозниклэн, ужысь ветеранлэн, Игра ёросысь дано муртлэн, удмурт писательлэн фондэз. Отын люкамын пöртэм документъёс: автобиографияез, кигожтэтъёсыз, печатлам книгаосыз, фельетонъёсыз, юморескаосыз. Люкам документъёс верало гуртысь механизаторлэсь-селькорлэсь колхоз удысын но гожъяськон удысын тыршыса ужамзэ. Ужъёсыз пöлын 117 зарисовкаосыз, веросьёсыз, кудъёсыз потэмын вал пöртэм аръёсы «Советской Удмуртия» «Удмуртская правда», «Вакыт», «Светлый путь» газетъёслэн бамъёсазы. Константин Васильевич Емельянов - дано механизатор но аслаз калыкезлы тодмо луись удмурт писатель. Улон сюресэз Емельяновлэн пырак ик герзаськемын Игра ёросысь вордйськем гуртэныз – Мазыгиен (Лонки- Ворцы). Татын ик дышетскиз но ужаз.

Пичи дырыз кин луонзэ нокин но уг тоды, дыр. Угось улон вапум отчы но, тачы но кожылэ. Трос арлыдо муртъёслэн пичи-дырзы герзаськемын каргам война вакытэн, со ваньзэ сураз-пожаз. Куд-огезлы дышетсконзэс но быдэстыны эрик ик öй вал ни, угось быгатйсьёсыз воргоронъёс фронтэ кошкемын, нош бусы ужъёсты пинальёслы но кышномуръёслы быдэсьяно луиз. Öз кылды Костя Емельяновлы но 10 классэ йылпумъяны. Со пинал даурзэ, тодаз ваенъёссэ автобиографияз тазы гожтэ: «1941 арын быдтй сизыым классмэ. Берпуметй экзаменмес 7-тй июне сетймы, нош арня нунал ортчем бере ваньмы дасяськимы вал документъёсмэс торжественно басьтыны. Нош çуказез шöдтэк шорысь келязы чугун сюрес лэсьтыны Лынгае. Милемын çош келямын вал быдзымъёсыз но, пичиосыз но пинальёс. Лыктыкумы пуктоно чугун сюреслэн трассаез дасямын вал нй: сик корамын, поттэмын, ужан участокъёс нумеровать каремын, котькуд колхозлэн аслаз участокез. 2-3 нунал ортчыса уж быдэс трасса вылын мынэ нй вал. Нунал ортчыса, потймы асьме участоке ужаны, шутэтскон нунальёс öй вал. 22 июне но тросэз ужын вал. Обед бере ваньмес люказы митинге, районысь лыктэм мурт лыдзиз ТАСС-лэсь Советской Союзлэн территорияз фашисткой Германилэсь ялытэк кунгожез тйяса пыремзэ. Соку ваньмыз валазы – война!...».

Колхоз удысын арлыдо воргоронъёсты воштоно луо егитъёс, 1943 арын Костя Емельянов трактористъёсты дасян курсъёсы пыре. Отын укмыс нунал гинэ дышетскыны вуэ. Тулыс ужъёс öръяськем бере, машинно-тракторной станциясь егит пиосты ысто сельхозартельёслы юртыны. Мар карод - вакытэз сыçe вал.

Война бере Емельянов йылпумъя тракторной бригадаослы кивалтйсьёсты дасян курсэз. Аръёс ортчемъя, Константин Васильевич ужын будйз. Вал тракторист но, кладовщик но, кема аръёс çоже ремонтной мастерскойлэн заведующиез луыса ужаз. 1975 арысен пенсие потытозяз тыршйз мастер-наладчик луыса. Ужын азинсконъёсыз пусъемын почетной грамотаосын, «Коммунистической ужысь ударник» нимез кема аръёс çоже нуиз, трос пол пыртылэмын Почет доскае но Почет книгае. 1986 арын кема но умой ужамез понна пусъемын «Ужысь ветеран» медален, 1987 арын сетэмын «Сиё-дано

колхозник» ним. Иван Петрович Чирковлэн, 1990-тй аръёсы «Рассвет» колхозлэн кивалтйсезлэн, Константин Емельяновлы сйзем характеристкаяз таё чуръёсыз вань: «Мынэ Лонки-Ворцы урам кузя Константин Васильевич, өвёл солэн бадзымьяськонэз, вылтйяськонэз. 40 арлэсь ятыр Емельянов Константин адзем карымон механизатролэсь ужзэ колхозын быдэсьяз, социалистической ёшатсконъёсын котьку азыпал радын вамышъяз. Вань улонэз солэн – со огкадь степенен уж, колхоз удысын –механизатор но гожьян удысын – писатель-сатирик...».

Константин Васильевичлэн пичи дыресеныз гожьяськон мылкыдыз былэм, школаын дышесткыкуз нылпиослы потйсь газетазы гожьям. «Советской Удмуртия» газет баме нырысетй зарисовкаосыз потэмын 1947 арын. Солэн геройёсыз – ёш ужам но улэм калыкез. Веросьёсаз, очеркъёсаз механизаторъёс, пудо вордйсьёс, строительёс сярысь мадылэмын. Гожьямъёсаз Константин Емельянов пёртэм ужпумъёсты жутылйз. Нырысетй серемес веросэз «Ветлй меда, ой меда?» 1960-тй аръёслэн шоразы «Советской Удмуртия» газете поттэмын. Котькуд адямилэн улоназ вунонтэм нуналъёс луо. Вань соос Емельяновлэн но. Бадзым шумпотон литераторлы К.Емельяновлы ваиз 1971 ар. Тужгес умойёссэ веросьёссэ «Удмуртия» издательство «Ветлй меда, ой меда...?» нимаз книгаен поттэ, отчы кызь кык серемес веросьёс, юморескаос, улонысь тумошо учыръёс пыртэмын.

Н.Белоноговлэн 1971 арын Константин Емельянов сярысь таё гоштэм чуръёсыз пумисько: «Усьтйськиз выль ошмес син. Умой ужасьёс, зеч адямиос сярысь Лонки-Ворцыысь механизатор Константин Емельянов ёмгес но ёмгес гожьяны одяз. Пичи информациос, 15-20 чуръем гоштэтъёс бордысен кутскыса, усто очеркъёс, веросьёс гожьяны дышиз. Оскиськом, пёзись ошмесэ йё уз кынмы...»

Берлогес лыдзйсьёс доры К.Емельяновлэн мукет книгаосыз вуо: «Бускельёс», «Эшьёсы-юлтошьёсы», «Пилиськем горшок», «Капка съёрын». Таосаз но шедё серемес веросьёсыз.

Фондэ интыямын почётной грамотаос, кудъёсыз солэсь ужаз но гожьян удысаз азинсконъёссэ пусъё. Трос шунйтэсь кылъёс К.Емельянов сярысь верало пёртэм журналистъёс но писательёс, кылсярысь, А.Кузнецов но Н.Белоногов, Г.Руднев но П.Поздеев, А.Шкляев но Р.Хайдаров.

Озы ик архивын вань пёртэм дыре лэсьтэм туспуктемъёс: К.Емельянов -механизатор, Константин Васильевич эшьёсыныз, сельскохозяйственной выставкае Москвае 1956 арын ветлыкуз.

Константин Васильевичлэн фондыстыз документъёс огшоры уг кыллэ, соос уже кутйсько пёртэм амальёсын: радъясько адзытонъёс, экскурсиос, газет бамъёсын печталасько.

Начальник архивного отдела

Е.В.Корепанова